

# Lain giugar questa partida

Dis da litteratura a Domat sco salon da gieus

■ (cp) Quest onn declarain nus la litteratura sco gieu. Ils 27avel Gieus da litteratura a Domat duain esser il salon da gieus, nua ch'ins chatta cumpogns per giugar.

## Noss gieus litterars

Il venderdi preschenta il poet, musicist e caricaturist svizzer *Manuel Stahlberger* ses nov program da solo «Neues aus dem Kopf». El raquinta e chanta sur da grondas ideas e pitschnas personas. Silsuenter vai vinavant cun la Shot-Story Night: Ti empostas. L'auturA arriva, sesa e prelegia ses text. A la fin di ella: «Viva!», e tuts bai-van da cumpagnia – ma il gieu cuntinue-scha cun auters auturs, cun auters auditors.

La sonda laschain nus discurren ils cudeschs cun la Living Library, la biblioteca viva, en la quala ils cudeschs èn personas sco ti ed jau. Quests cudeschs na pon ins pia betg prender en maun – na, cun quests cudeschs ston ins discurren.

Era tar l'occurrenza da scriver «La pagina» dastga in e scadin preleger en il foyer ses text davart il signal «En posiziun! Pront! Dai!».

La saira laschain nus alura reviver differents gieus auditivs rumantschs. ActurAs dattan nova vita a gieus umoristics scrits ils ultims 50 onns. Tocs da Cla Biert, Jon Semandeni, Schimun Vonmoos, *Michel Decurtins* e *Göri Klainguti* vegnan preschentads LIVE sin il palc.

La dumengia preschenta l'artist Yör Kauči alias *Jürg Gautschi* invistas e reflexiuns davart la fitness cun ina prelecziun scenica. E fits ston ins esser en fatschenta, en letg ed era per vegnir enta paradis.

E la victura dal Premi Term Bel dals Dis da litteratura 2016, *Stina Hendry*, experimentescha e gioga en ses nov project «Detta en bucca» ensemen cun Leander Albin cun atmosferas or dal mund da la lingua e musica.

## Vernissaschas, preschentaziuns e prelecziuns:

Als Dis da litteratura datti era quest onn differentas vernissaschas, preschentaziuns e prelecziuns.

La revista «Quarto 44» da l'Archiv svizzer da litteratura è deditgada a texts rumantschs che discurren da la naiv. La



Il motto dals 26avel Dis da litteratura a Domat stat sut il motto: Litteratura sco gieu. MAD

vernissascha vegn accumpagnada musicalmain da *Pascal Gamboni*.

Il musicist ed actur *Mario Pacchioli* preschenta ses nov project per chant, orchester sinfonic e clavazin «Remas». Sias cumposiziuns èn influenzadas da la chanson franzosa e da la canzone italiana e dattan in nov vestgi a poesias rumantschas da Giacun Hasper Muoth, Alfons Tuor u Flurin Camathias. Accumpagnà vegn el dal pianist *Gieri Maissen*.

L'autura *Chatrina Josty* preschenta ses nov cudesch cun texts curts «Barbacor – Herzkater». Ses texts raquintan d'ina generaziun che viva en in mund global, simultan e senza ragischs. Il musicist engiadinais *Roland Vöggtli* enramescha la vernissascha.

## Prelecziuns

*Dumenic Andry* prelegia or da ses nov cudesch da poesias «Sablun» ed envida ad in viadi ch'empermetta novas experienschas.

Il giuven 'autur da Berna cun ragischs rumantschas *Flurin Jecker* prelegia or da ses roman da début «Lanz». El raquinta dal giuven Lanz che sto scriver in blog davart sia vita e ses mund.

*Linarid Candreia* prelegia anecdotas or da la vita da «Pastiziers grischuns en l'Italia».

## Preschentaziuns:

La «La Litteratura 36» è quest onn sa deditgada a biografias fictivas. Ella vegn preschentada dals redactors *Silvana Derungs* e *Benedetto Vigne*. *Hubert Giger* e *Gerold Ehram* prelegian lur texts.

La «Chasa Paterna 135» vegn preschenta da l'autur engiadinais *Attilio Bivetti*.

Betg a la curta vegnan quest onn er las auturas ed ils auturs giuven. Ils victurs da la concorrenza da scriver da la Lia Rumantscha «Plema d'aur / Pledpiera» prelegian lur texts e discurren davart la concorrenza.

Ultra da quai preschenta *Mevina Puorger* sco mintg' onn sia nova publicaziun da editionmevinapuorger, quest onn: «La chastlauna», in raquint da l'autura enconuschna da Uorsin da la s-chella, *Selina Chönz*.

Ed er per ils uffants datti quest onn insatge als Dis da litteratura: il nov cudesch «Lina e Linard» da la Chasa Editura Rumantscha raquinta a la moda da «Joggeli söll go Birli schüttla» da dus uffants che na vulan betg turnar a chasa.

Il program detaglià dals Dis da litteratura 2017 chattais vus sin la pagina d'internet [www.disdalitteratura.ch](http://www.disdalitteratura.ch).